

開放文學 – 歷代筆記 – 夷堅丙志 第十卷

方氏女 婺州浦江方氏女·未適人·為魅所惑·每日過午·則盛飾插花就枕·移兩時乃寤·必酒色著面·喜氣津津然·女兄問其故·曰·不可言·人世無此樂也·道士百法治之·反遭困辱·或發其隱隱·曰·汝與某家婦人往來·道行如此·安得敢治我·或為批頰抵冠·狼狽而出·近縣巫術聞之·皆莫敢至其家·掃室焚香·具為訴牒·遣僕如貴溪·告於龍虎山張天師·僕至彼之日·女在堂上·見兩黃衣卒來追已·初猶不肯行·卒曰·娘子無所苦·才對事畢即歸矣·遂隨以去·凡所經途·皆平日所識·俄至東嶽行祠·引入小殿下·殿正北向·主者命呼女升殿·女竊視其服·紫袍紅鞞帶佩魚·全如今侍從之服·戒之曰·汝為山魃·繳繞曲折·吾已盡知·但當直述·將釋汝·初女被崇時·實其亡叔為媒灼·是日先在廷下·瞬目招女·使勿言·女竟隱其事·但說魅情狀及所與飲狎者·主者判雲·元惡及其黨十人·皆杖脊遠配·永不放還·而不刺面·餘五六十人·亦杖臀編管·傳囚決遣·與世間不少異·又敕兩卒送女還·時家人見女仆地·逾兩時·口眼皆閉·扶齒灌藥·施針灼艾·俱不省·但四體不冷·知其非死也·僕歸雲·既投狀·天師判送東嶽·限一時內結絕·故神速如此·自是女平安如常·逾年而嫁·則猶處子雲·

高教授

鄉人高通·字廣聲·為秦昌時婿·居於會稽外邑·與詹道子元宗友善·紹興辛巳·淮上受兵·通入城·舍於詹氏·與館客陳確日同處·相得甚歡·隆興二年·通為太學錄·確夫婦同夢通來·而身絕短小·確語妻曰·不見高廣聲才數月·一何短如此·俄相隨入臥內·妻慍曰·高教授當識道理·何為至吾床闌間·逐之不見·遂驚寤·明日以告道子·時通已病困·道子方以為憂·聞其事良不憚·是夕而訃至·明年·確妻復夢人昇樞入門·問之·曰·高官人也·覺而語確·確心知通之來為己子·預戒產具·即日得一男·右二事皆詹道子說·

掠剩大夫

揚州節度推官沈君·失其名及鄉里·居官頗強直·通判饒惠卿尤知之·惠卿受代歸臨川·一府僚屬·出祖於瓜洲·前一夕·沈聞書窗外人語曰·君明日祿盡馬絕·為妻子言·愀然不樂·明日·將上馬·厥子牽衣止之·沈曰·饒通判相與甚厚·方為千里別·安得不送·策馬徑行·所乘馬蓋借於軍中者·惡甚·始出城·奔而墜·足絀鞵間·不可脫·馳四十里·及瓜洲方止·馭吏追及之·則面目俱敗·血肉模糊·不可辨識·昇歸舍·氣息奄奄·經一日而絕·惠卿憐其以已死·賻錢二十萬·郡遣夫力十餘輩護柩歸·諸人在道相顧·如體挾冰霜·或時稍息·則頭輒痛·類有物擊之·兩旁行者·皆見一綠袍官人·坐柩上·執挺而左右顧·至家乃已·後歲餘·其妻閻氏·白晝見·旗幟奄冉行空中·一人跨白馬·跼蹙而下·至則沈也·相慰拊良久·又遍呼諸子·誨以讀書耕稼之務·曰·吾今為掠剩大夫·勛業雄盛·無憶我·翩然而去·自是不復來·閻氏之弟榕傳其事·

生肉勸酒

南豐曾氏·為臨川李氏婿·初親迎時·舅母張氏送之·遍歲求歸·李氏置酒餞別·張歸而慍曰·我在李家十數日·蒙渠主禮不為薄·但臨時忽以生肉勸酒·使我心惡不可堪·人問其狀·曰·羊一槃·豬一槃·鴨雞各一槃·凡四品·槃各四巨楮·皆生物也·釘飯雖豐·豈復可食·家人亦皆咄咄曰·不謂李官人家野陋乃如此·村婦邵八[女更]·實從張為客·私語人曰·安得是事·縣君豈別有所睹乎·張之夫先為光化軍司理·不挈家行·久之得赴雲死矣·後其子歸·乃言以去臘未盡三日死·死之日·同僚隨土俗具祭·用生物四大槃·其器皿名物·悉與張所見同·蓋張從李氏歸時·司理君始死受奠·千里影響·符契若是·異哉異哉·右二事皆李德遠說·

黃法師醮

魏道弼參政·夫人趙氏·紹興二十一年十月十六日·以病亡·至四七日·女婿胡長文元質延洞真法師黃在中·設九幽醮·影響所接·報應殊偉·魏公敬異之·及五七日·覆命主黃篆醮·先三日·招魂入浴·幼子叔介·年十二歲·以念母之切·願自入室持幡伺視·既入慟哭雲·母自白幡下坐椅上·垂足入浴·盆左右掛所著衣·正舉首相顧·忽焉不見·所以哀泣·已而迎魂至東偏靈位·黃師見夫人在坐·叔介至前即仆地·曰·媽媽在此·家婢小奴·先因病腫死·亦從而至·語言甚久·黃慮鬼氣傷兒·神·乃布氣吹其面·取湯一杯·令飲即醒·雲適往市門下看迎仙女·見數十人衣金錦袍·擁一轎·四角皆金鳳·口銜金絲毬·二仙童行前·捧金香炉唾壺·到吾家門·仙女出轎·見先生再拜請符·才得符·收置袖間·卻乘金毛羚羊·二童導而去·遂覺·蓋所見者·乃是夕壇上所供神虎堂追召魂魄者也·時已五鼓·方就睡·又夢入大門·將軍長丈許·金甲青鞵·引而行·殿上人服青服·戴青冠·執青圭·坐龍椅上雲太一救苦天尊也·聞呼第二曹請九天司命第□主者同坐·俄空中青雲起·玉女數百·捧紅幡幢·迎上清宮第六位至·共食仙果·叔介前觀之·為異鬼如師子形者·逼逐令去·將軍叱曰·救苦天尊請來對罪·安得輒逐·命獄卒碎斲之·左右天仙無數·嬉戲自如·或戴碎玉花冠·動搖有聲·雲是狼茫冠·上天真宰·下降檢察地獄·將軍曰·三界各有體·天界逍遙自在·故多快樂·人世務禮法·故尚恭敬謙遜·地府治人罪·故尚威猛·正自不同·又聞呼都察判官·追在獄囚·列廷下約萬人·皆荷鐵校·傳呼引第十人·直符使乘雲持牒下取·牒闊可二尺·長表丈·徑至地·挾此人同上雲去·其餘火輪銅柱·銅狗鐵蛇·鍛治於前·楚毒備極·三人著公服在其中·將軍曰·一為臨政酷虐·二為事父不孝·三為作監官不廉·監官乃吾弟·曾任潭州稅官·盜用公家錢而逃·至今在獄·而酷虐者獲罪尤重·叔介問如何可救·曰·除是轉九天生神章一萬遍·即可救拔·又引至鑊湯碎石舂律等獄·縱觀諸囚·叔介言敢問將軍何姓·曰·舊在人間姓王·此問無姓·每見世人設水陸請地府諸司·稱崔判官李判官之類皆不肯赴·不若只稱第幾司第幾案判官便了·又曰·吾得一幙次甚窄·身卻不在彼·常在壇上聽指揮·不敢離一步·便一兩字亦從吾手中過·然後奏上·吾一看三清·二看法師至誠·便是吃一盞白湯·也奏去·只為排得幙次不是·左右多有穢觸·又黃衣人炷香衣服不潔·負水人身體腥穢·一青衫小兒抱嬰孩來天尊位前戲狎·天尊怒·皆追來枷了·青詞甚好·宣開地獄·赦亦至誠·特以判官聲雄·道字不真·有一字讀作潭字·數人清不出·天尊主者皆怒·已而辨之·乃濤字也·主者白請放六人·判官密言赦文不明白·再墮其四·只赦兩人·其一則趙氏也·將軍曰·汝父常誚汝懶惰不讀書·我教汝聰明咒雲·無礙無遮廣聰明·喬律莎訶無緊揭·又聰明偈雲·大廣天地無礙遮·一界運奇比江海·一磨二磨轉不覺·才管一覺無礙空·戒令勿泄·每遇節序·焚香默誦百過·且謂人心如鏡·須管常磨·勿令塵染污·自然聰明·又言吾一身五職·第一三天門下引進主者·第二黃先生主掌文字·第三自然山主·第四監灰河主·第五職事微·不可說·遂引叔介至灰河·無罪者過橋·業重者解其下服·著度河褲·由河中過·岸上大枯木數株·鬼卒以所脫衣掛於上·續以車載從橋行·衣上各書姓名·窺其一標雲·屠氏十娘·叔介臨欲歸·拜將軍曰·自到冥間·荷將軍慈顧·答曰·汝何所謝·吾實當謝汝·憶昔嘗與汝同官·曾緣公累·賴汝調護得免·至今不忘·今歸時凡此中所見所說·盡為人道之·使知省戒·無得隱情·揖別而行·望其家已近·母在一室塗澤畢·令引至壇·對曰·黃先生不許孝子登壇·母乃獨登之·遍禮列位·詣黃君幙前·焚香拜曰·謝救苦·黃法師便冉冉翔空·回首言宿世冤家·皆得解脫·汝勿復悲惱·令從者取盂水噴叔介面·仍叱之·遂寤·天方明·自寢至覺僅數刻·而所經歷聞見·連日言之不能盡·魏公以其事物色之·蓋醮筵置龍虎堂·於四廂逼近外庖·往來喧雜·炷香者乃老卒·而汲水一兵患疥癩·圍中兒每敖戲聖位前·皆符其語·乃告白龍虎神·徙位於靜處·而易執事者·禁兒勿得至·又考所謂潭字之誤·蓋詞文舊語內雲·或死於水濤之中·道童書濤為淘·以唾潤指·指作濤字·不甚明瞭·故讀者誤焉·魏公自作記五千金·今摭取其大要如此·

朱新仲夢

朱新仲待制翌紹興二十八年守嚴州·夢至大山下·左右指雲崑山也·未幾徙宣州·宣城獻地圖·有鄉名崑山者·謂前夢已應·

又一歲徙平江·崑山正其屬縣·在平江日·夢典謁報洪內翰來·亟出迎·則予仲兄也·時自翰林學士奉祠居鄉里·既坐·乃居東道·覺而異之·不兩月新仲罷去·仲兄實踵其後雲·

常熟巧者

中大夫吳溫彥·德州人·累為郡守·後居平江之常熟縣·建第方成·每夕必夢七人衣白衣·自屋脊而下·以告家人·莫曉何祥也·未幾得疾不起·其子欲驗物怪·命役夫升屋·撤瓦遍觀·得紙人七枚於其中·乃巧者以傭直不滿志·故為厭勝之術·以禍主人·時王顯道為郡守·聞之·盡捕群匠送獄·皆杖脊配遠州·吳人之俗·每覆瓦時·雖盛暑·亦遣子弟親登其上臨視·蓋懼此也·吳君北人不知此·故墮其邪計·

茶肆民子

幹道五年六月·平江茶肆民家·失其十歲兒·父母連日出求訪·但留幼女守舍·一黃衣卒來啜茶·告雲·爾家幾郎使我寄語·早晚當附木筏還家·女喜祈客少駐·以俟父母歸·堅不可·臨去又云·明日幾郎自別寄信來·遂去·迨暮·父母歸·女具道其故·莫測所以然·而憂其非吉語也·明旦·外傳有浮屍在昇平橋河岸木筏側·奔往視之·乃所失子·傍人言頃年一急足溺於此·則民女所見·殆其鬼乎·

樂橋妖

平江樂橋民家女·既嫁·每夕為妖物所擾·母念之切·乃與同榻臥·將伺察之·財日暮·則一人從地蹣起·垂兩髻於背·紅繡弈然·大聲如疾雷·地亦隨合·凡數夕如是·以告其夫·夫穿地覓之·僅二尺許·得一銅鈴·以紅帶係其鼻·始憶數年前朝廷申嚴銅禁·故瘞鈴土中·久而忘之矣·即擊碎棄之·女疾遂愈·右四事皆朱似叔召說·

劉景文

承議郎任隨成·劉景文季孫甥也·言景文知忻州時·每數日輒一謁晉文公祠·至必與神偶語·移時乃出·神亦時時入郡·郡吏見景文閉合與客語·則神至也·他日於廣坐中·謂一曹掾曰·天帝當來召君·君即去·吾且繼往·坐客相視失色·未幾·掾果無疾而逝·景文亦相繼亡·經夕·蹶然復甦·索筆作三詩·詩成語家人曰·吾今掌事雷部中·不復為世間人矣·瞑目竟死·其一章雲·中宮在天半·其上乃吾家·紛紛鸞鳳舞·往往芝術華·揮手謝世人·竦身入雲霞·公暇詠天海·我非世人嘩·二章雲·仙都非世間·天神繞樓殿·高低霞霧勻·左右虯龍遍·雲車山嶽聳·風輦天地擅·從茲得舊渥·萬動毫端變·其三雲·從來英傑自消磨·好笑人□事更多·良上巽中為進發·一車安穩渡銀河·其語皆不可曉·予案東坡集·景文為隰州守以沒·此雲忻州恐非·何蘧春渚記聞雲·景文夢為文公之代而卒·其說不同·坡公稱景文詩句雲·四海共知霜鬢滿·重陽曾插菊花無·其清警如此·今三詩乃爾·生死之隔·一至是乎·

雍熙婦人詞